



Sud Bosne i Hercegovine
Суд Босне и Херцеговине

Broj; S1 3 Iž 031026 18 Iž
Sarajevo; 12.11.2018.godine

Sud Bosne i Hercegovine, u drugostepenom vijeću sastavljenom od sudija Dinke Bešlagić Čovrk kao predsjednika vijeća, Vesne Trifunović i Srete Crnjaka kao članova vijeća, odlučujući o žalbi žalitelja Socijaldemokratske partije BiH sa sjedištem u Sarajevu ulica Alipašina broj 41, izjavljenoj protiv Odluke Centralne izborne komisije Bosne i Hercegovine broj: 05-1-07-1-1274-58/18 od 05.11.2018.godine, u nejavnoj sjednici, održanoj dana 12.11.2018.godine, donio je

RJEŠENJE

Žalba se odbija.

Obrazloženje

Odlukom Centralne izborne komisije Bosne i Hercegovine, broj i datum navedeni u uvodu, izmijenjena je (III put) Odluka broj: 05-1-07-1-1274-1/18 od 22.10.2018.godine o utvrđivanju i objavljivanju rezultata Općih izbora u Bosni i Hercegovini na način što je stavom (1) izuzetno od utvrđenih rezultata u odluci broj: 05-1-07-1-1274-1/18 od 22.10.2018.godine o utvrđivanju i objavljivanju rezultata Općih izbora u Bosni i Hercegovini 2018.godine u dijelu Izvještaja o rezultatima glasanja za nivo 400 Predstavnički dom Parlamenta Federacije Bosne i Hercegovine:

- za političkog subjekta 00877 – Naša stranka, 5. mandat na kompenzacijskoj listi na kojem se nalazi kandidat Bukarić Želimir (Ostali) dodjeljuje se kandidatkinji istog političkog subjekta sa dopunske kompenzacijske liste iz izborne jedinice 11-nivo 411 Melank Miomirki (Srpkinja).

Stavom (2) utvrđeno je da predmetna Odluka stupa na snagu danom donošenja i objavit će se 06.11.2018. godine na internet stranici Centralne izborne komisije Bosne i Hercegovine i smatrat će se da je danom objavljivanja ista dostavljena strankama-učesnicima iz stava (1) ove odluke.

Žalitelj je blagovremeno uložio žalbu ističući da je Centralna izborna komisija BiH ignorisala odluku Apelacionog odjela Suda BiH broj S1 3 Iž 030950 18 Iž od 05.11.2018.godine u kojoj je naložena obnova postupka i dodjele kompenzacionog mandata uz uvažavanje žalbenih zahtjeva SDP BiH. Miomirka Melank je nezakonito je stavljan na „dopunsku kompenzacionu listu“ suprotno odredbama zakona koji definiše proces i uslove u kojima se dostavlja kompenzaciona lista i na šta se ona odnosi. Rok za dostavljanje dopunske kompenzacione liste je istekao, što je utvrđeno u naprijed navedenoj odluci Suda BiH. Stoga žalitelj ukazuje da je CIK izvršio povredu pravila postupka kada je imenovanoj dodijelio kompenzacioni mandat i nije ispoštovao

procedure propisane članom 10.6 stav 3 Izbornog zakona BiH. Kompenzacioni mandat se može dodijeliti samo kandidatima koji se nalaze na ovjerenoj kompenzacionoj listi političkog subjekta kojem pripada kompenzacioni mandat. Naša stranka nije imala uslove za podnošenje dopunske kompenzacione liste jer je imala još kandidata na svojoj kompenzacionoj listi, što se može utvrditi iz odluke CiK-a od 16.08.2018.godine. Nadalje, odluka o dodjeli dopunske liste od 05.11.2018.godine nije pravosnažna u smislu člana 209 b) ZUP-a jer nije prošao rok od 48 sati utvrđen Izbornim zakonom, čime lista nije stupila na snagu i nema pravno dejstvo. Budući da Naša stranka nije imala na ovjerenoj kompenzacionoj listi kandidata iz reda srpskog naroda taj kompenzacioni mandat trebao je biti dodijeljen u skladu sa članom 10.b Izbornog zakona BiH stranci koja ima najbolji izborni rezultat, a to je u konačnici žalitelj. Ukazujući na odluke CIK-a tokom Opštih izboira iz 2014. godine i dodjele kompenzacionih mandata za Narodnu skupštinu RS na Opštim izborima 2018. godine, žalitelj potkrepljuje navode o nepravilnosti osporavane odluke. upućivanje poziva Našoj stranci za dostavljanje dopunske kompenzacione liste dana 01.11.2018. godine nije imao pravnog osnova jer je u tom periodu bila na snazi odluka CiK-a od 29.10.2018.godine, koju je sud poništio, pa je dostavljanje dopunske liste nezakonito. Donoseći novo rješenje umjesto poništenog, postupajući organ može donijeti isto rješenje samo ako to opravdavaju novi razlozi koji nisu u suprotnosti sa pravnim shvatanjem suda ili ako to opravdava činjenično stanje utvrđeno u ponovno u smislu primjedbi suda. Evidentno je da je nova odluka donesena na podlozi istih dokaza na kojima je bila zasnovana i ukinuta odluka i da je organ mogao donijeti potpuno drugačiju odluku. Predlaže da se žalba uvaži, poništi ožalbeno rješenje i naloži CIK-u BiH da postupi u skladu sa članom 10.6 (3) Izbornog zakona BiH i umjesto kandidata Melank Miomirke sa nezakonite i nepravosnažne dopunske kompenzacione liste Naše stranke, mandat dodijeli Maji Bjelan Karačić sa kompenzacione liste SDP-a, ili da sud sam utvrdi činjenino stanje i na osnovu tako utvrđenog činjeninog stanja riješi upravnu stvar.

U odgovoru na žalbu Centralna izborna komisija Bosne i Hercegovine predložila da se žalba Socijaldemokratske partije odbije kao neosnovana. Navedeno je da je pri donošenju ožalbenog rješenja postupljeno po primjedbama Apelacionog odjela suda BiH u rješenju broj SI 3 Iž 030950 18 Iž od 05.11.2018.godine. Dopunska kompenzaciona lista je dostavljena i ovjerena čime je CiK postupio u skladu sa odredbama člana 1.1, člana 4.24 stav 2, člana 9.7 člana 10.1 stav 3 i 10.6 stav 2 Izbornog zakona BiH. Slučajevi na koje se žalitelj poziva samo potvrđuju da je prilikom donošenja ožalbenog rješenja postupano na pravilna i zakonit način.

Žalba nije osnovana.

Pobijana odluka Centralne izborne komisije izuzetno je od utvrđenih i objavljenih rezultata Opštih izbora u Bosni i Hercegovini 2018. godine u dijelu izvještaja i rezultatima glasanja za nivo 400 Predsjednički dom Parlamentarne skupštine Bosne i Hercegovine, za politički subjekt Naša Stranka 5 mandata na kompenzacionoj listi na kojoj se nalazio kandidat Bukarić Želimir (ostali) dodijelila je mandat kandidatkinji istog političkog subjekta Melank Milomirki. Odluka je donesena u ponovnom postupku, budući da je Apelaciono odjeljenje suda Bosne i Hercegovine rješenjem broj SI 3 Iž 030950 18 Iž od 05.11.2018.godine poništilo odluku Centralne izborne komisije broj 05-1-07-1-1274-24/18 od 29.10.2018.godine kojim je dodijeljen kompenzacioni mandat Melank Milomirki.

Centralna izborna komisija BiH je provela postupak dodjele kompenzacionih mandata u cilju primjene odredbi člana 10.1 stav (3) i člana 10.6 stav (2) Izbornog zakona BiH, na osnovu utvrđenja na od ukupnog broja od 98 zastupnika koji se biraju u PDPFBiH nije izabran dovoljan broj Srba. Politički subjekt koji je izjavio žalbu ne spori

činjenicu da u Predsjedničkom domu Parlamenta Federacije BiH nije izabran dovoljan broj Srba i da su ispunjeni uslovi za primjenu principa dodjele kompenzacijskih mandata u kome treba izvrši naknadni izbor i imenovanje poslanika po principima Izbornog zakona.

Prema stanju spisa proizilazi da je politički subjekt Naša stranka dostavila kompenzacionu listu koju je CIK Bosne i Hercegovine ovjerio odlukom broj 06-1-07-3-160/18 dana 16.08.2018. godine i da na ovoj listi nema kandidata koji su se izjasnili kao pripadnici srpskog naroda. Nadalje proizilazi da je Centralna izborna komisija BiH dopisom broj 06-1-07-3-160/18 od 31.10.2018 godine pozvala politički subjekt Naša stranka da u roku od 48 sati dostavi dopunsku kandidatsku listu, koja je dostavljena dana 01.10.2018. godine. Odluku o ovjeri dopunske kandidatske liste za dodjelu kompenzacionog mandata za Opšte izbore 2018. godine za Predsjednički dom Parlamenta Federacije BiH sa kandidatom Melank Milomirkom, Centralna izborna komisija donijela je pod brojem 06-1-07-3-160/18 od 05.11.2018.godine. Na osnovu ovjerene dopunske kompenzacijske liste doneseno je ožalbeno rješenje broj 05-1-07-1-1274-58/18 od 05.11.2018.godine kojim je mandat za nivo 400 PDPFBiH sa dopunske kompenzacijske liste dodijeljen Melank Miomirki (Srpkinji).

Na osnovu iznesenog Apelaciono vijeće je utvrdilo da je osporavano rješenje doneseno na osnovu pravilne primjene odredbe člana 9.7 Izbornog zakona Bosne i Hercegovine, budući da političkom subjektu Naša stranka, kojoj pripada posljednji količnik prema odredbi člana 10.6 stav 1 i 2 Izbornog zakona, na ovjerenoj kompenzacijskoj listi nije bilo pripadnika srpskog naroda. Dalje je utvrđeno da je CIK BiH odredbom člana 9.7a Izbornog zakona imao uslove za obavještanje Naše stranke o potrebi dostavljanja dopunske kompenzacione liste koja je prema dokazima iz spisa dostavljena u skladu sa članom 4.24 navedenog zakona i u zakonom propisanom roku. Na osnovu ukazanog zaključeno je da je ožalbeno rješenje doneseno na zakonom propisan način.

Sama činjenica da je ožalbeno rješenje doneseno u ponovnom postupku nema uticaja na njegovu pravilnost i zakonitost. Naime, iz rješena Apelacionog odjeljena suda BiH broj SI 3 Iž 030950 18 Iž od 05.11.2018.godine jasno proizilaze razlozi poništenje ranije odluke CIK-a o dodjeli kompenzacionog mandata kandidatkinji Naše stranke Melank Miomirki, a razlog je da je kandidatkinja izabrana sa redovne liste, te da je poništena odluka donesena prije upućivanja zahtjeva za dostavljanje dopunske kompenzacione liste, na koji način je CIK postupio protivno imperativnoj normi.

U ponovnom postupku CIK BiH je otklonio nedostatke na koje je ukazano u sudskoj odluci. Prije svega ožalbenom odlukom mandat je dodijeljen kandidatu sa dopunske kompenzacione liste, što je u skladu sa primjenjenom zakonskom odredbom, a ne sa redovne liste kako je to prvobitno odlučeno. Nadalje, osnov za donošenje odluke bila je ovjerena dodatna kompenzaciona lista, a što ima karakter drugačijeg činjeničnog stanja pa se ne može prihvatiti navod žalbe da nije bilo osnova da se u ponovnom postupku donesne odluka identična odluci iz poništenog rješenja.

Neprihvatljivi su navodi žalbe da je Melank Milomirka nezakonito stavljena na dopunsku kompenzacionu listu jer iz provednih dokaza jasno proizilazi da je ovjera dopunske liste na kojoj se nalazila imenovana, izvršena u skladu sa zakonom. Žalba ukazuje da odluka o ovjeravanju dodatne kompenzacione liste nije bila pravosnažna u vrijeme donošenja odluke o dodjeli mandata, budući da su donesene istog dana. Ova okolnost bez uticaja je na pravilnost odluke i ne bi dovela do drugačijeg činjeničnog stanja, niti bi uticala na drugačiju primjenu materijalnog prava jer je u međuvremenu odluka o ovjeravanju dodatnog kompenzacionog mandata postala pravosnažna, dakle, nije osporavana žalbom.

Iz navedenih razloga apelaciono upravno vijeće Apelacionog odjeljenja Suda Bosne i Hercegovine, nalazi da je pobijana odluka Centralne izborne komisije Bosne i Hercegovine pravilna i zakonita a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Službeni glasnik BiH br. 19/02 do 74/10) valjalo odbiti.

PREDSJEDNIK VIJEĆA
SUDIJA
Dinka Bešliagić Čovrk